



*Suceso en Maside”, con un presupuesto de 48.000 €, redactado por el ingeniero técnico agrícola don Demetrio Espinosa Mangano, colegiado nº 84, se expone al público, en la secretaria del ayuntamiento, durante el plazo de quince días contados a partir de su publicación en el BOP, para examen y presentación de reclamaciones por todas las personas interesadas.*

*Documento firmado electrónicamente.*

**R. 1.983**

## San Cibrao das Viñas

Ao non se presentar reclamacións durante o prazo de exposición ao público, queda automaticamente elevado a definitivo o acordo plenario inicial aprobatorio da Ordenanza municipal reguladora de prevención de incendios forestais, cuxo texto íntegro se fai público, para o seu xeral coñecemento e en cumprimento do previsto no artigo 70.2 da Lei 7/1985, de 2 de abril, de bases de réxime local.

O Pleno da Corporación, na sesión que tivo lugar o día 17 de xuño de 2020 adoptou o acordo que se transcribe a continuación:

“Primeiro. Aprobación inicialmente a Ordenanza municipal de prevención de incendios forestais nos termos en que figura no expediente.

Segundo. Someter a dita ordenanza municipal a información pública e audiencia dos interesados, con publicación no Boletín Oficial da Provincia e taboleiro de anuncios do concello, polo prazo de trinta días para que poidan presentar reclamacións ou suxestións, que serán resoltas pola Corporación. De non presentarse reclamacións ou suxestións no mencionado prazo, considerárase aprobada definitivamente sen necesidade de acordo expreso polo Pleno.

Simultaneamente, publicar o texto da ordenanza municipal no portal web do concello [<http://sancibrao.sedelectronica.es>] co obxecto de darlles audiencia aos cidadáns afectados e reunir cantas achegas adicionais poidan facerse por outras persoas ou entidades.

Terceiro. Reunir directamente a opinión das organizacións ou asociacións recoñecidas por lei que agrupen ou representen ás persoas cuxos dereitos ou intereses lexítimos se visen afectados pola norma e cuxos fins garden relación directa con seu obxecto.

[Poderá prescindirse dos trámites de audiencia e información públicas previstos no artigo 133 no caso de normas orzamentarias ou organizativas da Administración xeral do Estado, a Administración autonómica, a Administración local ou das organizacións dependentes ou vinculadas a estas, ou cando concorran razóns graves de interese público que o xustifiquen].

Cuarto. Facultar o alcalde para subscribir e asinar toda clase de documentos relacionados con este asunto”.

“Ordenanza municipal de prevención de incendios forestais

Contido: 1

Exposición de motivos: 2

Título I.- Disposicións xerais: 2

Título II.- Fundamentos legais: 4

Título III.- Xestión da biomasa vexetal: 6

Título IV.- Procedemento de orde de execución de xestión de biomasa vexetal: 9

Título V.- Plantacións: 12

Título VI.- Infraccións, sancións e procedemento sancionador: 13

Disposición transitoria: 15

Disposición derogatoria: 16

Disposición derradeira: 16

Anexo I: especies pirófitas: 17

Anexo II: especies frondosas: 18

Anexo III: modelo de comunicación previa para cortas de arborado en solo urbano e de núcleo rural: 19

Exposición de motivos

O Plan de desenvolvemento rural de Galicia 2014-2020 recoñece os incendios forestais coma un dos máis importantes problemas ambientais de Galicia, constituíndo unha grave causa de perdas de riqueza nas economías rurais, un risco severo para as persoas e os ecosistemas e unha fonte inesgotable de gasto público. Por todo o anterior, cómpre desenvolver políticas activas de prevención e loita contra incendios forestais que permitan protexer de xeito efectivo os recursos naturais e humanos do territorio dos riscos asociados ao lume.

Neste senso, a aprobación da Lei 3/2007, do 9 de abril, de prevención e defensa contra os incendios forestais de Galicia, implicou a implantación de novas estratexias de prevención de incendios forestais que perseguían cumprir con estes obxectivos. Porén, as novas medidas de prevención de incendios establecidas pola Lei supuxeron adquisición de novas responsabilidades por parte de todos os axentes sociais relacionados directa ou indirectamente co medio rural e forestal.

No que concirne ás responsabilidades dos concellos, o artigo 16 da Lei 3/2007 establece un conxunto de normas e consideracións técnicas que o Concello de San Cibrao das Viñas incorporou á súa planificación por medio da aprobación do Plan de prevención e defensa contra incendios forestais municipal. Porén, algúns aspectos esenciais da prevención de incendios forestais a escala municipal non foron explicitamente determinados na Lei 3/2007, polo que deben ser concretados por medio da aprobación dunha ordenanza municipal específica.

Conforme á potestade atribuída polos artigos 4 da Lei 7/1985, do 2 de abril, reguladora do réxime local e 6 da Lei 5/1997, do 22 de xullo, reguladora da Administración local de Galicia, coa presente ordenanza o Concello de San Cibrao das Viñas propón desenvolver a regulación da xestión da biomasa vexetal e das distancias de plantación de especies arbóreas e arbustivas, no solo urbano, de núcleo rural e urbanizable delimitado, así como o deseño do procedemento administrativo de orde de execución de xestión de biomasa vexetal, no ámbito das súas competencias, co obxecto de conseguir as axeitadas condicións de seguridade para reducir os riscos asociados aos incendios forestais, protexendo destes ás persoas, ás poboacións, ás infraestruturas e aos ecosistemas.

Título I.- Disposicións xerais

Artigo 1.- Obxecto

O obxecto desta ordenanza é a regulación da xestión da biomasa vexetal no territorio municipal do Concello de San Cibrao das Viñas e dentro do seu ámbito competencial, nos termos definidos na Lei 3/2007, de prevención e defensa contra incendios forestais de Galicia.

Artigo 2.- Ámbito de aplicación

En consonancia co establecido no artigo 4.2 da Lei 5/1997, do 22 de xullo, reguladora da Administración local de Galicia, o disposto nesta ordenanza aplicarase naqueles ámbitos que non estean explicitamente regulados na lexislación básica en materia de prevención e defensa contra incendios forestais.

Concretamente, será de aplicación en toda superficie municipal situada no interior de núcleos de poboación (solo de núcleo rural, urbano e urbanizable delimitado), así como naqueles terreos forestais ou de influencia forestal (situados a menos de 400 metros de terreos forestais) que se atopen a menos de 50 metros de núcleos de poboación e de edificacións ou instala-

cións illadas, segundo establece o artigo 21 da Lei 3/2007, de prevención e defensa contra incendios forestais de Galicia.

#### Artigo 3.- Definicións

**Solo urbano:** terreos que a planificación urbanística (Plan xeral de ordenación municipal) do concello tivese definido e clasificado como tal en virtude do disposto na lexislación urbanística (vixente no momento de aprobación do PXOM: Lei 9/2002, de 30 de decembro, de ordenación urbanística e protección do medio rural de Galicia)

**Núcleos rurais:** terreos que se incluían dentro dos núcleos rurais delimitados na planificación urbanística municipal (Plan xeral de ordenación municipal), de conformidade co disposto na lexislación urbanística (vixente no momento de aprobación do PXOM: Lei 9/2002, de 30 de decembro, de ordenación urbanística e protección do medio rural de Galicia).

**Solo urbanizable delimitado:** terreos que non tendo a condición de solo urbano, de núcleo rural nin de solo rústico a planificación urbanística (Plan xeral de ordenación municipal) tivese definido e clasificado como tal ao poder ser obxecto de transformación urbanística nos termos fixados na lexislación urbanística (vixente no momento de aprobación do PXOM: Lei 9/2002, de 30 de decembro, de ordenación urbanística e protección do medio rural de Galicia).

**Xestión da biomasa vexetal:** eliminación parcial ou total da biomasa vexetal por medio do emprego das técnicas máis eficaces, con mínimo impacto ambiental (preferiblemente mecánicas) e coa intensidade e frecuencia necesarias para xerar nivel de discontinuidades horizontais e verticais dos combustibles que garantan o cumprimento das condicións mínimas de seguridade e salubridade legalmente esixibles así como a conservación dos valores naturais.

**Persoas responsables:** persoas titulares dos terreos, ou no seu caso usufrutuarios do dereito de aproveitamento sobre os terreos, urbanos, urbanizables delimitados e de núcleo rural, así como as persoas, administracións, entidades ou sociedades que poidan considerarse responsables aos efectos do establecido no artigo 21 ter da Lei 3/2007, de prevención e defensa contra incendios forestais de Galicia.

**Terreo forestal:** terreo que cumpre con algún dos criterios especificados no artigo 2 da Lei 7/2012, de 28 de xuño, de montes de Galicia.

**Zonas de influencia forestal:** áreas estremeiras que abarcan una franxa circundante dos terreos forestais cunha anchura de 400 metros, excluindo o solo urbano, de núcleo rural e o urbanizable delimitado.

**Especies pirófitas:** especies consideradas xeradoras ou potenciadoras dos riscos vencellados aos incendios forestais e que están incluídas na disposición adicional terceira da Lei 3/2007, de prevención e defensa contra incendios forestais de Galicia (Anexo I desta ordenanza).

**Especies frondosas:** especies arbóreas autóctonas incluídas no anexo 1 da Lei 7/2012, de 28 de xuño, de montes de Galicia (Anexo II desta ordenanza).

#### Título II.- Fundamentos legais

##### Artigo 1.- Fundamentos legais

Descríbense brevemente a continuación as normas vixentes de maior relevancia en relación coa prevención de incendios forestais e coas distancias de plantación de árbores

##### 1. Artigos 582, 591 e 592 do Código Civil:

- Establecen as distancias mínimas que debe haber entre árbores ou arbustos e as propiedades estremeiras, así como as condicións baixo as cales poderá ordenarse ou executar a poda de ramas ou raíces que invadan unha propiedade estremeira.

2. Decreto 2661/1967, de 19 de outubro, sobre distancias entre plantacións e terreos estremeiros.

- Define as distancias mínimas que deberán respectar as novas repoboacións forestais con cultivos agrícolas estremeiros, en función da especie forestal que se vaia plantar.

3. Decreto 81/1989, de 11 de maio, sobre medidas de ordenación das novas plantacións co xénero Eucaliptus.

- Complementa o establecido no Decreto 2661/1967 con respecto ás distancias mínimas que deberán respectar as novas repoboacións forestais de eucaliptos con terreos estremeiros.

4. Lei 43/2003, de 21 de novembro, de montes.

- Establece algunhas consideracións xerais acerca das responsabilidades das persoas e das administracións na prevención de incendios forestais, o réxime sancionador relacionado cos incendios forestais, entre outros aspectos.

5. Lei 7/2012, de 28 de xuño, de montes de Galicia.

- Modifica gran parte do disposto na Lei 3/2007 e establece as distancias mínimas a respectar polas novas repoboacións forestais.

6. Decreto 105/2006 de 22 de xuño, polo que se regulan as medidas relativas á prevención de incendios forestais, á protección dos asentamentos no medio rural e á regulación de aproveitamentos e repoboacións forestais.

- Establece por primeira vez na lexislación galega un conxunto de consideración e limitacións normativas en relación coa prevención de incendios forestais.

7. Lei 3/2007 de 9 de abril, de prevención e defensa contra incendios forestais de Galicia.

- Define as redes secundarias de faixas de xestión de biomasa vexetal, as responsabilidades das persoas titulares de terreos no cumprimento da xestión de biomasa vexetal, así como as responsabilidades dos concellos na planificación da prevención de incendios forestais e na instrución dos procedementos necesarios para facer efectiva a xestión da biomasa vexetal, entre outros aspectos.

8. Orde de 18 de abril de 2007 pola que se zonifica o territorio con base no risco espacial de incendio forestal.

- Determina os concellos que son considerados como zona de alto risco de incendio, entre os cales non se inclúe o concello de San Cibrao das Viñas.

9. Orde do 31 de xullo de 2007 pola que se establecen os criterios para a xestión da biomasa vexetal.

- Establece as condicións mínimas legalmente esixibles coa que se debe xestionar a biomasa vexetal por parte das persoas responsables nas zonas definidas na Lei 3/2007.

10. Lei 39/2015, do 1 de outubro, de procedemento administrativo común das administracións públicas.

- Dispón as características que debe cumprir o procedemento administrativo de orde de execución de xestión de biomasa vexetal.

11. Lei 2/2016, do 10 de febreiro, do solo de Galicia.

- Define no seu artigo 135 as obrigas das persoas titulares de terreos de mantelos nunhas condicións mínimas de seguridade, salubridade, accesibilidade universal e ornato público.

12. Decreto 143/2016, de 22 de setembro, polo que se aproba o Regulamento da Lei 2/2016, do 10 de febreiro, do solo de Galicia.

- Complementa, no seu artigo 332, o disposto na Lei 2/2016, no que concirne ás responsabilidades dos titulares de terreos.

13. Lei 9/2017, de 26 de decembro, de medidas fiscais e administrativas.

- Introduce modificacións á Lei 3/2007 no referente ás características das redes de faixas de xestión de biomasa vexetal e do procedemento para a xestión da biomasa vexetal.





14. Instrución 1/2018, do 26 de abril, relativa ás actuacións administrativas en materia de cumprimento das obrigas de xestión da biomasa vexetal e retirada de especies arbóreas impostas pola Lei 3/2007, do 9 de abril, de prevención e defensa contra os incendios forestais de Galicia, a Lei 6/2011, do 13 de outubro, de mobilidade de terras, e a Lei 7/2012, do 28 de xuño, de montes de Galicia.

- Desenvolve en profundidade as características do procedemento de orde de execución de xestión da biomasa a vexetal para instruír polo concello e dos procedementos sancionadores vencellados.

### Título III.- Xestión da biomasa vexetal

Sección 1ª Xestión da biomasa vexetal no interior dos núcleos de poboación

#### Artigo 1.- Obrigas de xestión de biomasa vexetal

As persoas responsables, segundo o establecido no artigo 3 desta ordenanza, de terreos situados en solo urbano, urbanizable delimitado, ou de núcleo rural deberán xestionar a biomasa vexetal dos seus terreos antes do 30 de maio de cada ano.

#### Artigo 2.- Criterios de xestión da biomasa vexetal

1. A xestión da biomasa vexetal por parte das persoas responsables deberá executarse

conforme cos seguintes criterios:

a. En solo urbano, urbanizable delimitado, ou de núcleo rural non poderán existir exemplares de especies pirófitas, de acordo coa definición establecida no artigo 3 desta ordenanza, salvo que o correspondente informe técnico acredite que os exemplares posúen un especial valor natural ou ornamental ou que, por atoparse illados, non constitúen un risco significativo en relación coa propagación de incendios forestais.

b. No estrato arbóreo, as masas estarán formadas por especies non consideradas pirófitas, de acordo coa definición establecida no artigo 3 desta ordenanza. Os exemplares deberán estar distanciados entre si como mínimo 7 metros e deberán estar debidamente podados no terzo inferior da súa altura ata un máximo de 4 metros, salvo que, polo debidamente xustificado valor natural ou ornamental destes, o correspondente informe técnico desaconselle a execución destas medidas.

c. As árbores deberán atoparse a unha distancia mínima de 2 metros coas antas de parcelas estremeiras, medida en horizontal dende o tronco, a unha altura de 1,3 m.

d. Nos estratos herbáceo e arbustivo, realizaranse rozas para garantir o cumprimento do disposto no apartado b) do artigo 2 da Orde do 31 de xullo de 2007 pola que se establecen os criterios para a xestión da biomasa vexetal e en ningún caso estes estratos poderán superar unha altura de 1 metro. As rozas serán realizadas a feito por medios mecánicos, salvo que o correspondente informe técnico, tras determinar a presenza de exemplares de especial valor natural ou ornamental, recomende a execución de rozas selectivas ou por medios manuais.

e. No caso de terreos nos que existan edificacións en estado ruinoso ou de abandono, realizaranse as actuacións de xestión de biomasa vexetal necesarias para garantir a accesibilidade á propiedade, evitando en todo caso que a vexetación medre de xeito que comprometa a estabilidade estrutural da edificación.

f. Os criterios anteriores non serán de aplicación no caso de parques, xardíns ou espazos verdes de titularidade pública.

Sección 2ª Limitacións técnicas e normativas á xestión da biomasa vexetal

Artigo 3.- Réxime de autorizacións para cortas de arborado no interior dos núcleos de poboación

1. A corta de calquera exemplar arbóreo en solo urbano, de núcleo rural requirirá da presentación no rexistro do concello

dunha comunicación previa (modelo do Anexo III) cunha antelación de 15 días á execución da corta.

2. A corta de calquera exemplar arbóreo que existira en solo urbanizable delimitado antes da entrada en vigor da Lei 7/2012 de montes de Galicia requirirá da correspondente solicitude de autorización á Xunta de Galicia, segundo o establece a disposición transitoria quinta da devandita lei.

3. Naqueles casos nos que, conforme ao disposto no artigo 6 desta ordenanza, sexa preceptiva a corta de exemplares arbóreos para o cumprimento das obrigas de xestión de biomasa vexetal, a persoa responsable non estará exenta do réxime de autorización establecido neste artigo.

#### Artigo 4.- Biomasa vexetal residual

En cumprimento do establecido no artigo 95 da Lei 7/2012 de montes de Galicia, tras a realización das rozas ou cortas que resulten preceptivas en cumprimento das obrigas de xestión de biomasa vexetal deberá executarse adicionalmente una trituration de restos in situ, agás no caso dos elementos leñosos de diámetro maior de 5 centímetros, que deberán ser retirados da parcela, salvo que o correspondente informe técnico prescriba expresamente o contrario.

#### Artigo 5.- Afeccións á xestión da biomasa vexetal

1. Como norma xeral, no caso de que a execución de actuacións de xestión da biomasa vexetal estea condicionada por limitacións normativas establecidas por lexislacións sectoriais vixentes ou mesmo suxeita a un réxime de autorizacións, estas limitacións xunto coa necesidade de autorización deberán ser analizadas e incluídas no correspondente informe técnico.

2. Se, como conclusión do correspondente informe técnico, se desprende a necesidade de solicitar autorización a unha determinada Administración sectorial para executar a xestión da biomasa vexetal, a persoa responsable da dita execución, conforme co disposto no artigo 3 desta ordenanza, será a única responsable de facer efectiva a dita solicitude.

#### Artigo 6.- Tipos de afeccións á xestión da biomasa vexetal

A xestión da biomasa vexetal nos espazos que constitúen o ámbito desta ordenanza

poderá verse legalmente condicionada polos seguintes tipos de afeccións:

1. Recursos hídricos: sempre que a execución da xestión da biomasa vexetal afecte a ou sexa realizada nas inmediacións de canles catalogadas pola Confederación Hidrográfica Miño-Sil, analizarase a necesidade de solicitar autorización ao organismo de conca, o que deberá reflectirse no correspondente informe técnico. Como norma xeral, nas zonas de servidume dos cursos fluviais, nunha franxa de 5 metros dende o límite da canle, non se procederá á xestión da biomasa vexetal, salvo que así o autorice expresamente o organismo de conca.

Nas zonas de policía dos cursos fluviais, nunha franxa de 100 metros dende o límite da canle, aplicaranse na medida do posible métodos selectivos de control da vexetación, resultando preceptiva a solicitude de autorización ao organismo de conca no caso de que as actuacións de xestión de biomasa vexetal afecten significativamente a especies non consideradas pirófitas, de acordo co establecido no artigo 3 desta ordenanza.

2. Conservación de hábitats e especies: en ningún caso se procederá á xestión da biomasa en hábitats identificados como prioritarios no anexo I da Directiva Hábitats (Directiva 92/43/CEE do Consello, do 21 de maio). No suposto de que o correspondente informe técnico ditamine que as actuacións de xestión de biomasa vexetal poden afectar directa ou indirectamente a especies de flora ou fauna protexidas, deberá solicitarse autorización á Administración competente en materia de conservación da natureza antes de executar as devanditas actuacións.

3. Procesos erosivos: en cumprimento da obriga establecida no artigo 44.2 d) da Lei 7/2012, de montes de Galicia, en zonas de elevadas pendentes, de solos fráxiles ou nas que existen evidencias de que se dan ou se poden dar procesos erosivos significativos, poderá proporse unha redución da intensidade da xestión da biomasa co fin de protexer os solos, se así o establece o correspondente informe técnico, que deberá contar co informe favorable da Administración forestal competente.

4. Patrimonio cultural: conforme ao disposto na Instrución de 8 de novembro de 2017 relativa ao trámite de autorizacións en materia de patrimonio cultural nos bens inmobles catalogados e declarados de interese cultural, os seus contornos de protección e as zonas de amortecemento, sempre que se realicen actuacións de xestión de biomasa vexetal nas inmediacións de bens catalogados do Patrimonio Cultural pedirase autorización á Administración autonómica competente, salvo que se trate de podas ou rozas por medios manuais ou mecanizados portátiles. Nos contornos de protección dos bens catalogados non será preciso solicitar autorización mentres as actuacións propostas non modifiquen significativamente a escena urbana ou a paisaxe natural na que se atopan.

**Título IV.- Procedemento de orde de execución de Xestión de biomasa vexetal**

**Artigo 1.- Publicación de información**

O Concello de San Cibrao das Viñas publicará anualmente na súa páxina web unha cartografía das redes secundarias de faixas de xestión de biomasa vexetal definidas no Plan de prevención e defensa contra incendios municipal, xunto cun listado onde se relacionen as referencias catastrais das parcelas afectadas polas franxas definidas no artigo 21 da Lei 3/2007.

**Artigo 2.- Procedemento de orde de execución de xestión de biomasa vexetal**

1. As persoas físicas ou xurídicas responsables, segundo o disposto no artigo 21.2 da Lei 3/2007, deberán executar a xestión da biomasa vexetal nos seus terreos de acordo co establecido na Orde do 31 de xullo de 2007 pola que se establecen os criterios de xestión da biomasa vexetal ou, no seu caso, no artigo 6 desta ordenanza antes do 30 de maio de cada ano.

2. Unha vez transcorrida esta data sen que os responsables executaran as actuacións pertinentes de xestión de biomasa vexetal, o concello poderá dar inicio á instrución do procedemento de orde de execución de xestión de biomasa vexetal.

**Artigo 3.- Inicio do procedemento de orde de execución de xestión de biomasa vexetal**

1. Unha vez transcorrida a data do 30 de maio de cada ano, os servizos técnicos municipais, así como calquera cidadán, poderán poñer en coñecemento a posible situación de incumprimento das obrigas de xestión de biomasa vexetal mediante a presentación no rexistro do concello da correspondente instancia na que deberá identificarse unha única parcela obxecto do procedemento mediante polígono e parcela catastrais.

2. Unha vez presentada a instancia, o órgano instrutor emitirá unha providencia na que será solicitado un informe técnico de información previa, no que se determinará a necesidade de ordenar a execución de actuacións de xestión de biomasa vexetal, conforme coa lexislación vixente.

3. Se as conclusións do informe técnico ditaminan que a parcela obxecto do procedemento incumpre efectivamente as obrigas de xestión de biomasa vexetal, o órgano instrutor procederá á incoación do procedemento de orde de execución de xestión de biomasa vexetal.

**Artigo 4.- Resolución do procedemento de orde de execución de xestión de biomasa vexetal**

1. Tras a incoación do expediente e a emisión do informe de secretaría, procederase á emisión da proposta de orde de execución, que será comunicada á persoa responsable, outorgándolle un período de 10 días para presentar as alegacións, documentos ou xustificacións que estime pertinentes.

2. Unha vez transcorrido o dito prazo sen que a persoa titular presente alegación ningunha (tal e como debe acreditar o certificado de secretaría), procederase á emisión da orde de execución, que deberá ser notificada de xeito íntegro nun prazo inferior a 10 días á data de emisión, conforme co establecido no artigo 40.2 da Lei 39/2015, do 1 de outubro, de procedemento administrativo común das administracións públicas.

**Artigo 5.- Execución das actuacións**

1. O prazo xeral para a execución das actuacións de xestión de biomasa vexetal é, segundo o establece o artigo 22.3 da Lei 3/2007, de 15 días naturais, contado dende o día seguinte á data de recepción da notificación por parte da persoa titular.

2. Unha vez transcorrido ese prazo, os servizos técnicos municipais poderán visitar a parcela obxecto do procedemento e, mediante a redacción do correspondente informe técnico de execución, constatar o cumprimento ou incumprimento da execución ordenada.

3. Se o devandito informe técnico conclúe que as actuacións ordenadas foron executadas nos termos esixidos na orde de execución, poderá procederse ao arquivo do expediente de orde de execución de xestión de biomasa vexetal.

**Artigo 6.- Incumprimento das obrigas**

1. Se o informe técnico de execución ditamina que as actuacións de xestión de biomasa vexetal foron executadas só parcialmente ou incumprindo parte do resolto na orde de execución, procederase á emisión dunha nova orde de execución, nos termos establecidos no artigo 14.2 desta ordenanza, na que se detallarán as actuacións necesarias para o total cumprimento das obrigas de xestión de biomasa vexetal outorgando un novo prazo para a súa execución.

2. No caso de que o informe técnico de execución conclúa que as actuacións ordenadas non foron executadas, nin total nin parcialmente, actuarase do modo seguinte:

a) Procederase á liquidación provisional dos custos da execución subsidiaria repercutindo na persoa responsable.

b) Ordenarase á execución subsidiaria das actuacións.

c) Porase en coñecemento do correspondente servizo da xefatura territorial da Xunta de Galicia o incumprimento das obrigas de xestión de biomasa vexetal, para os efectos de que poida iniciarse o correspondente procedemento sancionador.

**Artigo 7.- Notificación infrutuosa**

1. De acordo co artigo 44 da Lei 39/2015, de 1 de outubro, de procedemento administrativo común das administracións públicas, no caso de que a persoa responsable sexa descoñecida, non posúa domicilio de notificación coñecido, ou a notificación a esta non se poida facer efectiva, o concello levará a cabo a notificación mediante a súa publicación no Boletín Oficial do Estado e no Diario Oficial de Galicia.

2. No caso anterior, o cómputo do prazo para a execución das actuacións iniciárase dende o día seguinte ao da data de publicación da notificación no Boletín Oficial do Estado.

**Artigo 8.- Execución subsidiaria**

1. Para a liquidación provisional dos custos da execución subsidiaria empregaranse os prezos das tarifas TRAGSA vixentes en cada anualidade correspondentes ás actuacións de xestión de biomasa vexetal ordenadas.





2. O concello poderá optar entre a contratación do servizo de execución subsidiaria e a execución con medios municipais. Neste último caso, os custos para liquidar finalmente serán estimados polos servizos técnicos municipais.

3. Tras a execución subsidiaria das actuacións de xestión de biomasa vexetal procederase á liquidación final, co correspondente cobramento ou devolución do saldo acreedor ou debedor resultante.

4. No caso de non ser posible a liquidación provisional ou final dos custos da execución subsidiaria, por ser a persoa responsable descoñecida, comunicárase este feito ao correspondente servizo da xefatura territorial da Xunta de Galicia, podendo dar comezo a un procedemento de expropiación forzosa da parcela obxecto do expediente, en caso de exceder o importe para liquidar o valor catastral desta.

Artigo 9.- Informes técnicos de xestión de biomasa vexetal

1. Os informes técnicos, tanto de información previa como de execución, que formen parte do procedemento de orde de execución de xestión de biomasa vexetal deberán ter o seguinte contido mínimo:

a) Identificación da parcela mediante referencia catastral e plano de situación.

b) Descrición xeral da parcela. Tipos de afección (rede secundaria, núcleo urbano, etc.) e plano de superficies afectadas. Accesos e límites.

c) Análise da composición específica e da estrutura (alturas e densidades) dos estratos herbáceo/arbustivo e arbóreo existentes na parcela.

d) Fotografías que amosen visualmente o estado da vexetación descrita.

e) Caracterización dos combustibles en termos de risco e comportamento do lume asociado baixo escenarios meteorolóxicos desfavorables.

f) Análise de posibles afeccións á xestión da biomasa vexetal.

g) Propostas de actuación.

h) Conclusións.

Título V.- Plantacións

Artigo 1.- Repoboacións forestais

1. De acordo co establecido no artigo 67 da Lei 7/2012, do 28 de xuño, de montes de Galicia, non está permitido executar novas repoboacións forestais en solo urbano, de núcleo rural ou urbanizable delimitado.

2. As repoboacións forestais preexistentes á entrada en vigor da devandita Lei 7/2012 que estean situadas en solo urbano, de núcleo rural ou urbanizable delimitado deberán ser adaptadas ao establecido no anexo II da Lei 7/2012, mantendo como norma xeral unha distancia mínima de 30 metros (15 metros no caso de frondosas incluídas no anexo II desta ordenanza) con edificacións, vivendas illadas, depósitos de lixo, parques e instalacións industriais ou 50 metros (25 no caso de frondosas incluídas no anexo II desta ordenanza) con gasoleiras e outras instalacións nas que se desenvolvan actividades cualificables de perigosas, segundo a Lei 1/1995, do 2 de xaneiro, de protección ambiental de Galicia.

Artigo 2.- Especies prohibidas

Non está permitida a plantación de exemplares de especies arbóreas pirófitas, de acordo coa definición establecida no artigo 3 desta ordenanza (especies incluídas no anexo I), en solo urbano, de núcleo rural ou urbanizable delimitado.

Artigo 3.- Distancias de plantación de árbores

1. A plantación de calquera exemplar arbóreo, de especies non incluídas no anexo I desta ordenanza, en solo urbano, de núcleo rural ou urbanizable delimitado deberá cumprir coas seguintes distancias de seguridade:

a. 2 metros coas antas das parcelas estremeiras.

b. 4 metros co dominio público de vías de comunicación.

c. 5 metros con canles fluviais de máis de 2 m de anchura.

d. 5 metros con liñas de tendido eléctrico (medido ata a proxeción horizontal do elemento condutor incluíndo a súa desviación máxima co vento, segundo á normativa aplicable a cada caso).

e. 25 metros co límite exterior de gasoleiras e outras instalacións nas que se desenvolvan actividades cualificables de perigosas, segundo a Lei 1/1995, do 2 de xaneiro, de protección ambiental de Galicia.

2. As distancias mediranse en horizontal dende o tronco da árbore.

Título VI.- Infraccións, sancións e procedemento sancionador.

Artigo 1.- Infraccións

1. O incumprimento das obrigas de xestión de biomasa vexetal establecidas tanto nesta ordenanza como na Lei 3/2007, do 9 de abril, de prevención e defensa contra incendios forestais de Galicia, constitúe unha infracción, de acordo co establecido no artigo 50.2 da devandita lei.

2. O incumprimento das prescricións establecidas nos artigos 20, 21 e 22 desta ordenanza constitúe unha infracción, de acordo co establecido no artigo 128 da Lei 7/2012, de montes de Galicia.

3. O incumprimento da obriga establecida no artigo 7 desta ordenanza, concernente ao réxime de autorizacións nas cortas de arborado constitúe unha infracción.

Artigo 2.- Cualificación das infraccións por incumprimento das obrigas de xestión de biomasa vexetal

1. Posúen a cualificación de infracción leve:

a. A definida no artigo 23.1 desta ordenanza, derivada do incumprimento das obrigas de xestión de biomasa vexetal, segundo o establece o artigo 51 da Lei 3/2007.

2. Posúen a cualificación de infracción grave:

a. A infracción definida no artigo 23.2 desta ordenanza, derivada do incumprimento das prescricións sobre plantación de árbores en núcleos poboacionais, de acordo co establecido no artigo 129 da Lei 7/2012, de montes de Galicia.

b. A definida no artigo 23.3 desta ordenanza, derivada do incumprimento do réxime de autorizacións en materia de cortas de arborado.

3. A comisión de tres infraccións leves no prazo de dous anos, constitúe, así mesmo, unha infracción grave.

Artigo 3.- Contías das sancións por incumprimento das obrigas de xestión de biomasa vexetal

1. As contías definidas para as sancións pola comisión de infraccións leves, segundo o establece o artigo 74 da Lei 43/2003, do 21 de novembro, de montes, son de 100 a 1.000 euros.

2. As contías definidas para as sancións pola comisión de infraccións graves, segundo o establece o artigo 74 da Lei 43/2003, do 21 de novembro, de montes, son de 1.001 a 100.000 euros.

3. Cando para a protección dos distintos aspectos considerados nesta ordenanza concorran outras normas de rango superior, as infraccións sancionaranse conforme ás maiores contías e severas medidas establecidas.

Artigo 4.- Gradación das sancións

1. En cada expediente sancionador a contía da multa poderá ser graduada, atendendo aos criterios establecidos nos artigos 52 da Lei 3/2007 e 132 da Lei 7/2012, de montes de Galicia.

2. Adicionalmente aos criterios citados no punto anterior, no caso de incumprimento da xestión da biomasa vexetal en solo urbano, de núcleo rural, ou urbanizable delimitado, teranse en conta os seguintes criterios complementarios:

a. O índice de prioridade de actuación, definido no Plan de prevención e defensa contra incendios forestais municipal, que estea asignado á parcela obxecto do procedemento.

b. A presenza na parcela obxecto do procedemento de especies arbóreas pirrófitas para os efectos do artigo 3 desta ordenanza.

c. A presenza na parcela obxecto do procedemento de edificacións en estado ruinoso ou de abandono.

3. No caso de incumprimento das prescricións sobre plantación de árbores en solo urbano, de núcleo rural, ou urbanizable delimitado, teranse en conta os seguintes

criterios complementarios:

a. Se os exemplares plantados son especies pirófitas, de acordo coa definición establecida no artigo 3 desta ordenanza.

b. Se o incumprimento concirne ás distancias mínimas con gasolinerías ou outras instalacións nas que se desenvolvan actividades cualificables de perigosas

segundo a Lei 1/1995, do 2 de xaneiro, de protección ambiental de Galicia.

4. No caso de incumprimento do réxime de autorizacións en materia de cortas de arborado en solo urbano, de núcleo rural, ou urbanizable delimitado, terase en conta o seguinte criterio complementario:

a. Se os exemplares cortados pertencen a especies de frondosas, de acordo co artigo 3 desta ordenanza.

Artigo 5.- Multas coercitivas

1. A comisión de infraccións por incumprimento da xestión da biomasa vexetal e por incumprimento das prescricións sobre plantación de árbores poderá dar lugar á imposición de multas coercitivas.

2. As multas coercitivas serán reiteradas por períodos dun mes, sendo a contía de cada multa do 20% da sanción total fixada para a infracción cometida.

3. Para a exacción das sancións, en defecto de pago voluntario ou acatamento da sanción imposta, seguirase o procedemento administrativo de constrinximento.

Artigo 6.- Competencia sancionadora

1. A competencia para iniciar e instruír o procedemento sancionador por incumprimento das obrigas de xestión de biomasa vexetal nas redes secundarias de faixas, de acordo co establecido no punto quinto da Instrución 1/2018, do 26 de abril, relativa ás actuacións administrativas en materia de cumprimento das obrigas de xestión da biomasa vexetal (...), pertence unicamente á Xunta de Galicia.

2. A competencia para iniciar e instruír o procedemento sancionador por infraccións no interior dos núcleos de poboación, de acordo co artigo 54 da Lei 3/2007, do 9 de abril de prevención e defensa contra incendios forestais de Galicia, pertence á Administración local.

3. No suposto do parágrafo anterior, a competencia para resolver os procedementos sancionadores pola comisións de infraccións leves e graves pertence á persoa titular da Alcaldía, mentres que no caso da comisión de infraccións moi graves pertencerá ao Pleno municipal.

Disposición transitoria

As repoboacións forestais preexistentes á entrada en vigor desta ordenanza que, como consecuencia da súa aplicación,

atopáranse a unha distancia menor a regulada no artigo 20, disporán dun período máximo de dous anos para adaptarse á citada disposición, agás autorización expresa do órgano competente da Xunta de Galicia en materia forestal.

Disposición derogatoria

Quedan derogadas as disposicións municipais que contraveñan o disposto nesta ordenanza

Disposición derradeira

Esta ordenanza entrará en vigor no día da súa publicación no Boletín Oficial da

Provincia de Ourense.

Anexo I: Especies pirófitas

Nome científico; Nome común

*Pinus pinaster*; Piñeiro galego, piñeiro do país

*Pinus sylvestris*; Piñeiro silvestre

*Pinus radiata*; Piñeiro de Monterrey

*Pseudotsuga menziesii*; Piñeiro de Oregón

*Acacia dealbata*; Mimosa

*Acacia melanoxylon*; Acacia negra

*Eucalyptus* spp.; Eucalipto

*Calluna vulgaris*; Queiruga

*Chamaespartum tridentatum*; Carqueixa

*Cytisus* spp.; Xesta

*Erica* spp. Uz; carpaza

*Genista* spp. Xesta; piorno

*Pteridium aquilinum*; Fento común

*Rubus* spp.; Silva

*Ulex europaeus*; Toxo

Anexo II: Especies frondosas

Nome científico Nome común

*Pinus sylvestris*; Piñeiro silvestre

*Taxus baccata*; teixo

*Alnus glutinosa*; Ameneiro

*Acer pseudoplatanus*; Pradairo

*Betula* sp.; Bidueiro

*Fraxinus excelsior*; Freixo

*Fraxinus angustifolia*; Freixa

*Castanea sativa*; Castiñeiro

*Castanea x hibrida*; Castiñeiro híbrido

*Prunus avium*; Cerdeira

*Quercus robur*; Carballo

*Quercus pirenaica*; Cerquiño

*Quercus suber*; Sobreira

*Quercus petraea*; Carballo albar

*Quercus ilex* spp. Ballota.; Aciñeira

*Quercus rotundifolia*; Aciñeira

*Coryllus avellana*; Abeleira

*Fagus sylvatica*; Faia

*Ulmus glabra*, *Ulmus minor*; Umeiro

*Laurus nobilis*; Loureiro

*Sorbus aria*; Sorbeira do monte

*Sorbus aucuparia*; Capudre

*Juglans regia*; Noqueira

*Arbutus unedo*; Érbodo

## Anexo III

Modelo de comunicación previa para cortas de arborado en solo urbano ou de núcleo rural.  
Comunicación previa de corta de árbores en solo urbano ou de núcleo rural

## 1. Datos do solicitante.

Nome e apelidos/ Razón social \_\_\_\_\_ NIF/DNI/NIE \_\_\_\_\_

Nome e apelidos representante \_\_\_\_\_ NIF/DNI/NIE \_\_\_\_\_

Enderezo \_\_\_\_\_ nº \_\_\_\_\_ C.P. \_\_\_\_\_

Localidade \_\_\_\_\_ Provincia \_\_\_\_\_ Teléfono \_\_\_\_\_

## 2. Localización da corta

Lugar \_\_\_\_\_ Parroquia \_\_\_\_\_

Polígono catastral \_\_\_\_\_ Parcela catastral \_\_\_\_\_

## 3. Características da corta.

Nome da árbore	N.º que se vai cortar

## Declaración responsable

Declaro baixo a súa exclusiva responsabilidade que é certo o que manifesta e, en todo caso:

1. Que as características indicadas reflicten fielmente a corta que se vai realizar.
2. Que se cumpriran os requisitos da normativa específica.
3. Que non se van realizar cortas sometidas ao deber previo de autorización.
4. Que conta coas autorizacións para a ocupación do dominio público ou sectoriais que resulten necesarias.
5. Que achega toda a documentación preceptiva.

Autoriza, para os efectos da normativa de protección de datos de carácter persoal, a esta Administración á comprobación telemática con outras administracións públicas de datos declarados e demais circunstancias relativas ao exercicio da actividade para desenvolver.

E comunica que executará a corta a partir do día \_\_\_\_\_ (A comunicación debe realizarse con 15 días de antelación á realización da corta) cun prazo de execución de 6 meses.

San Cibrao das Viñas, \_\_\_\_ de \_\_\_\_\_ de 20\_\_”

Contra o presente acordo, interporase recurso contencioso-administrativo, ante a Sala do Contencioso-Administrativo del Tribunal Superior de Xustiza de Galicia, no prazo de dous meses contado desde o día seguinte ao da publicación deste anuncio, de conformidade con el artigo 46 da Lei 29/1998, de 13 de xullo, da xurisdición contencioso-administrativa.

San Cibrao das Viñas, á data da sinatura electrónica.

O alcalde.